

Davos accompignament

Tecum – accompignament per personas grev malsaunas e moribundas

DA SUSI ROTHMUND / FMR

■ **Parents che tgiran basegnan savens agid e sustegn, oravontut sch'ei tgiran grev malsauns ni moribunds. En talas situaziuns ein malsauns e parents leds dalla preschientscha dils accompignaders voluntaris da Tecum Grischun (www.tecum-graubuenden.ch) ni da voluntaris dalla gruppa da Tecum Surselva.** «Haveis forse era semegliants patrats sco jeu duront leger las annunzias da morts: Quella persuna ei gie en mia vegliadetgna, l'autra aunc bia pli giuvna ch'jeu. Gie, ei secapescha buca da sesez ch'ei va bein cun mei e ch'jeu astgel aunc viver. Auters ein grev malsauns ed ella davosa fasa dalla veta?», aschia sora *Madlen Büttler* dalla claustra a Glion.

Accompignament amureivel

Sco sora Madlen scriva en in communicau ch'ella ha tarmess dacuort als mieds da massa vegnan malsauns tgrai da lur parents a moda amureivla ed accompignai bein da personas dil fatg. Quei seigi fetg impurtont e necessari per carstgauns ella davosa fasa dalla veta. En talas situaziuns drovien lur confamiliars savens sustegn ed agid. In agid che voluntarias e voluntaris da Tecum Grischun ni era dalla gruppa da Tecum en Surselva possien porscher. En discuors persunals e cun «sempamein esser cheu» sustegnien ils accompignaders voluntaris ils malsauns e lur confamiliars. Tut quels accompignaders han frequentau il cuors «accompignament ella davosa fasa dalla veta» ed han passentau ina notg silla staziun da tgira palliativa el Spital cantunal a Cuera nua ch'ei han empriu d'enconuscher differentas situaziuns. Era personas che tgrai ni miran da malsauns vegnan suste-



Tenor sora Madlen Büttler ei il cuors «accompignament ella davosa fasa dalla veta» ina porschida impurtonta.

FOTO S. ROTHMUND

nidas dils voluntaris da Tecum pertuccont cumiau da cars carstgauns ch'els tgrai ed accompognan. Ed ei vegnan era susteni en lur pensum da sustener ed accompignar ils parents dils malsauns e moribunds. Tenor sora Madlen ei il cuors «accompignament ella davosa fasa dalla veta» ina porschida per carstgauns che vulan seconfruntar personalmein cun la tematica esser malsauns, murir e prender cumiau.

«Igl ei in cuors che regala bia segirtad e confidanza en sesez per affruntar la sfida el survetsch d'accompignar personas ella davosa fasa dalla veta», scriva sora Madlen ch'ei specialista da tgira ed ha sezza gia 20 onns experientscha ella tgira palliativa.

Ell'ei responsabla pils cuors ch'ella dat ensemen culla specialista da tgira, *Rita Berther*. A referir vegnan tier differentas tematicas era autras personas dil fatg.

Tgei ei Tecum?

Tecum porscha accompignament da grev malsauns e moribunds.

Per pertuccai e confamiliars en Surselva

Dapi 17 onns accompognan voluntarias e voluntaris da Tecum carstgauns en situaziuns difficilas, carstgauns grev malsauns e moribunds. Quei fan ei a casa, en in asil ni en spital. Ils voluntaris fan «guardia da seser» duront la notg e pil di ora e sustegn aschia grev malsauns e moribunds. Leutier discargan ei ils confamiliars e quei duront 365 dis ad onn. Igl engaschi da Tecum succeda en entelgientscha culs pertuccai, confamiliars ed ils responsabels per la tgira. L'unien ei interconfessiunala ed ils engaschis ein gratuits. Tecum ei cheu per vus.

Tel. 081 353 70 88
info@tecum-graubuenden.ch,
www.tecum-graubuenden.ch

Ulteriuras informaziuns:

Glendisdis, ils 2 da mars dallas 10.00–16.00 ha in di d'informaziun davart igl intent ed il program dil cuors e davart la basa dalla lavur palliativa liug ella Casa Sentupada a Glion. Il cuors cuntegn treis moduls nua ch'ei vegn mintgamai tractau differentas tematicas. Igl emprem modul ha liug ils 23 e 24 da mars 2020, il secund ils 20 e 21 d'avrel 2020 ed il tierz ils 18 e 19 da matg 2020. Per damondas saveis contactar sora Madlen Büttler, tel. 081 926 96 85 ni Rita Berther, tel. 081 943 11 90/079 657 44 05.
www.hausderbegegnung.ch